

Rapòrt resumé

Introdukshon

Dia 11 di ougùstùs 2011, Pais Kòrsou, komo persona hurídiko di derecho públiko, a firma un akuerdo atministrativo ku SONA pa desaroyo i realisashon di un hospital nobo, operashonal i duradero pa Pais. SONA a keda enkargá ku realisashon di e meta akí.

Na 2018, a establese e asina yamá entidatnan di HNO, esta: HNO Holding, HNO TE i HNO VB. E mesun aña ei, a base di un palabrashon ku Pais, SONA a traspasá na HNO TE e tareanan di transishon. Na mitar di aña 2019, a traspasá e otro tareanan (esta, di konstrukshon) na HNO VB.

Na inisio di e proyekto na 2011, tabata referí na e hospital komo 'NHN'. Despues ku e lokalidat a kambia pa Otrobanda na sèptèmber di 2013, a kuminsá referí na e hospital komo 'HNO'. Entretantu, nòmber ofisial di e hospital a bira CMC. Tambe sa referí n'e komo CMC/HNO. Dia 15 di mei 2018, Parlamento a manda un karta pa Kontraloria General di Kòrsou pa pidi un investigashon di e proyekto. En bista di e gran impakto sosial i finansiero ku e proyekto akí tin riba komunidad, na e momento ei, Kontraloria tabatin un investigashon andando kaba al respekto i, p'esei, por a kuminsá traha inmediatamente riba e petishon di Parlamento.

E investigashon ta konsistí di sinku parti. Ta raportá riba e sinku partinan akí den kuater rapòrt. Esakí ta e di tres rapòrt, 'Utilisashon di Presupuesto', i ta trata e di kuater parti di e investigashon. E periodo investigá ta kore, en prinsipio, te ku desèmber di 2019.³

E pregunta di investigashon ta lo siguiente:

E gastu total di e proyekto a keda denter di e presupuesto fihá?

Aki, e palabra 'presupuesto' ta referí na dos diferente presupuesto: na promé lugá, e presupuesto i presupuestonan supletorio ku Parlamento a aprobá, via kua Pais a presupuestá e gastunan di e proyekto, (di awor padilanti, presupuesto di Pais). Na di dos lugá, ta trata di e presupuesto di proyekto ku a palabrá pa SONA, pa ehekushon di e proyekto.

³ E kuenta final di SONA ta kore te dia 1 di desèmber 2020 i, riba petishon di SONA, a inkluí e gastunan responsabilisá (te na e fecha ei) den e kuenta.

Ta kontestá e pregunta pa kada presupuesto apart. Promé, ta presentá e resúmen, konklushon- i rekomendashonnan pa e periodo di NHN i despues pa e periodo di HNO.

Resúmen, konklushon i rekomendashon

PRESUPUESTO DI PAIS

Periodo di NHN

Resúmen

Den e periodo di NHN, a presupuestá i gasta, na tur, NAf. 23,2 mion. Pais a reservá suficiente fondo riba presupuesto di servisio ordinario pa por kubri e gastunan ku SONA den e fase preparatorio di e proyekto.

Konklushon


Pais a fasilitá fondo na SONA den e periodo di NHN, kedando den e presupuesto i presupuestonan supletorio ku Parlamento a aprobá.

Periodo di HNO

Resúmen

Den e periodo di HNO, di 2013 te ku 2019, Pais a hasi gastu na balor di NAf. 532,6 mion pa e proyekto akí. Por parti e gastunan akí den tres kategoria, esta, fondo entregá na SONA pa ehekushon di e proyekto (NAf. 387,7 mion), adelanto hasí na e entidatnan di HNO (NAf. 64,1 mion) i demas gastu relashoná ku e proyekto (NAf. 80,8 mion). Aproximadamente 50% di e gastunan (NAf. 267,4 mion) no tabata presupuestá na promé instante riba e presupuesto- i presupuestonan supletorio ku Parlamento a aprobá. Pa kubri e posibel eksesonan di presupuesto, a pasa un total di NAf. 142,2 mion na kambio di presupuesto conforme artíkulo 47 insiso 3 di Lv C-2010 i un total di NAf. 95,4 mion na kambio di presupuesto conforme artíkulo 46 insiso 1. E último kaso mensioná ta nifiká ku a inkluí e kambionan di presupuesto den e kuentanan anual korespondiente i Parlamento lo aprobá esakinan na momento ku e aprobá e kuentanan anual. E restante di NAf. 29,8 mion no ta kubrí i den e kuentanan anual korespondiente tambe e ta aparesé komo défisit riba e pòst di presupuesto korespondiente.

E siguiente gráfiko ta muestra, pa kada un di e kategorianan mensioná, ki parti di e gastunan tabata presupuestá, a ser kubrí via kambio di presupuesto conforme artíkulo 47 insiso 3, òf conforme artíkulo 46 insiso 1, òf sino a keda sin ta kubrí.



Pa kubri e adelantonan na balor di NAf. 64,1 mion hasí na e entidatnan di HNO, a usa prinsipalmente fondo ku tabata riba presupuesto di servisio di kapital, destiná pa CDI (NAf. 4,6 mion) i e entradanan risibí di benta di UTS (NAf. 52,3 mion). Di e último suma mensioná, a risibí un adelanto di NAf. 12,75 mion bèk na kuminsamentu di yanüari 2020. Den e sumanan presupuestá i di gastu ku ta aparesé den e konsepto di kuenta anual 2019, e adelantonan no ta inkluí e suma akí.

Na kada un di e okashonnan ku a pasa kambio presupuestario conforme artíkulo 47 insiso 3, Konseho di minister a aprobá e intenshon di kambio presupuestario promé, manera lei ta preskribí. Sin embargo, lei ta preskribí tambe ku e proyekto di ordenansa nashonal en kuestion mester keda presentá na Gobernador pa despues presentá e kambionan na Parlamento, loke sí no a tuma lugá. Komo resultado, ta te ora ku bai

trata aprobashon di e kuentanan anual, Parlamento lo hañ'é konfrontá ku e kambionan akí.

Konklushon

Kontraloria a konkluí ku a eroshoná Parlamento su derecho di presupuesto i no a honra esaki debidamente:

1. Tabata sa kaba di sierto gastu ku tabata na kaminda i tòg, na promé instante, a keda sin presupuestá esakinan na e manera preskribí, esta, den e presupuesto inisial ku Parlamento mester aprobá. Durante un aña presupuestario, en prinsipio, mester kanalisá kambio di presupuesto mas tantu posibel via presupuesto supletorio. Lei ta preskribí tres momento fiho⁴ pa esei tuma lugá. Ta solamente si e momento indiká a pasa kaba i tin un nesesidat urgente ku mester atendé promé ku e siguiente momento yega, òf den kaso ku tur tres momento a pasa kaba, por desviá di e regla akí a base di artíkulo 47. Asta ora un kambio di presupuesto sosodé via aprobashon di e kuenta anual mediante un ordenansa nashonal, mester evitá mas tantu posibel di inkluí kambio di presupuesto ku lo mester a sosodé mas promé den e aña presupuestario. Por ehèmpel, pa 2017, 2018 i 2019, na promé instante e fondonan reservá pa e proyekto tabata nihil, apesar ku tabata sa ku ainda tabatin respetivamente, NAf. 70,4 mion, NAf. 71 mion i NAf. 19,6 mion ku mester a bai pa SONA.
2. No a sigui e prosedimentu preskribí den lei serka niun di e kambionan di presupuesto hasí conforme artíkulo 47 insiso 3, na un balor total di NAf. 142,2 mion, Debí na esei, Parlamento no a keda informá di antemano. Ku otro palabra, ta posteriormente Parlamento ta haña sa di e kambionan i pues, ta hañ'é konfrontá ku un 'echo kumplí'.
3. A hasi gastu na balor di NAf. 29.8 mion ku no tabata kubrí den presupuesto.

Rekomendashon

Ta rekomendá Parlamento pa mustra Minister di Finansa riba e echo ku mester kumpli debidamente ku e reglanan di kontabilidad. Entre otro, mester presupuestá gastu na tempu i, si mester hasi kambio den transkurso di un aña presupuestario, esei mester tuma lugá mas tantu posibel via presupuesto supletorio. Ademas, ora presentá un nesesidat urgente ku no a ser premirá i tin ku hasi un kambio conforme artíkulo 47 insiso 3 di Lv

⁴ Conforme artíkulo 42 insiso 1 i artíkulo 46 insiso 1 i 2 di Lv C-2010, e momentonan fiho akí ta 15 di mei, 15 di ougùstùs i 15 di novèmber.

C-2010, mester traha un proyekto di ordenansa nashonal i informá Parlamento al respekto via Gobernador. De echo, esaki ta un defisiensi ku Kontraloria a plantia anteriormente kaba relashoná ku kontrol di e kuentanan anual.

PRESUPUESTO DI PROYECTO

SONA a prepará e kuenta final di e proyekto pa e periodo te dia 1 di desèmber 2020. Den e kuenta final, no ta hasi distinshon entre e gastunan di e periodo di NHN i esunnan di e periodo di HNO. Debí ku pa kada un di e dos periodonan akí tabatin otro palabrashon tokante presupuesto di e proyekto, Kontraloria sí a hasi e distinshon akí.

Periodo di NHN

Resúmen

Den e periodo di NHN, SONA a risibí NAF. 23,2 mion di Pais i a hasi gastu neto na balor di NAF. 22,6 mion.

Mayoria di e gastunan di SONA tabata pago hasí na e organisashon di ehekushon BINT. Den e periodo akí, direktiva di SONA mes no a hasi gastu relashoná ku e Akuerdo Atministrativo i e Akuerdo di Maneho. Durante e periodo di NHN, Pais no a palabrá un presupuesto ainda ku SONA, ya ku e tempu ei ainda e proyekto tabata den su fase preparatorio i no ta tur su partinan a ser elaborá.

Konklushon

Pa loke ta e gastunan di e periodo di NHN, SONA a keda den presupuesto. Esei ta debí ku e tempu ei ainda no a fiha un presupuesto konkreto.

Rekomendashon

Den e kuenta final ku SONA a presentá na Kontraloria den kuadro di e proseso di skucha tur dos banda ('hoor en wederhoor'), no ta hasi distinshon entre gastu hasí pa NHN i gastu hasí pa HNO. Kontraloria ta rekomendá pa hasi e distinshon akí, ya ku esei lo duna un bista mas kla.

Periodo di HNO

Resúmen

Pais a palabrá un presupuesto di NAf. 421,8 mion ku SONA pa e proyekto. Na 2016, Pais a destiná NAf. 14 mion pa un otro meta. Debí na esei, ta un presupuesto di NAf. 407,8 mion a resta.

SONA, HNO TE i HNO VB a hasi gastu relashoná ku e proyekto. Mester rindi kuenta tokante e gastunan akí.

SONA

Den e periodo di 2013-2019, pais a manda un total di NAf. 400,7 mion na fondo relashoná ku HNO pa SONA i direktamente pa e kreditoran di SONA.

Den su kuentanan di entrada i gastu pa 2013 te ku 2018, SONA a rindi kuenta tokante e gastunan di proyekto hasí den e añanan ei i SOAB a kontrolá e kuentanan akí. Entretantu, SONA a prepará e kuenta di 2019 i SOAB ta kontrolando esei tambe. Ademas, resientemente, SONA a prepará e kuenta final i su nota splikativo. Den e kuenta akí, a parti e gastunan di proyekto hasí te ku dia 1 di desèmber 2020 den gastu presupuestá i gastu no presupuestá. Un akountent eksterno a kontrolá e kuenta final dia 3 di desèmber. Den e kuenta final, SONA a responsabilisá NAf. 294,4 mion na gastu presupuestá i NAf. 106,3 na gastu no presupuestá.

Aki ta sigui e sumanan ku SONA a responsabilisá:

	Gastu di SONA	Presupuesto	Sobrante
Gastu presupuestá	294,4	407,8	113,4
Gastu no presupuestá	<u>106,3</u>	<u>0</u>	<u>-106,3</u>
Total	400,7	407,8	7,1

E gastunan no presupuestá ta suma NAf. 106,3 mion. Di e suma akí, NAf. 18,7 mion ta relashoná ku kosto ku HNO TE a hasi i ku SONA a paga na 2018 i 2019. Pues, tumá neto, SONA a eksedé e presupuesto ku NAf. 87,6 mion. Aki ta sigui un splikashon di e ekseso di presupuesto.

Splikashon ekseso di presupuesto SONA (na mion Naf.)

1	Retraso den ehekushon di proyekto		
	Claimnan di BNI debí na entrega lat di tereno di konstrukshon, pa motibu ku SEHOS no por a hasi e edifisionan disponibel na tempu (schuifplan SEHOS), pa por a basha nan abou na tempu.	33,1	
	Gastu di maneho i consultant di Konstrukshon i di Ekipo i Mobilario debí ku, pa motibu di e retrasonan, mester a hasi uso di e servisionan di consultant mas largu	14,7	
	Asistensia na SEHOS ku ehekushon di e schuifplan	7,1	
		54,9	63%
2	No a risibí eksonerashon di derecho di importashon i omzetbelasting , manera a suponé na promé instante	14,2	16%
3	Gastu di atministrashon SONA 2016-2020 debí ku SONA mes a asumí e tareanan di atministrashon	10,6	12%
4	Diverso	7,9	9%
	Total	87,6	100%

SONA a finansiá e gastunan no presupestá ku fondo destiná originalmente pa otro pòst di gastu ku sí tabata presupestá.

E Entidatnan di HNO

For di meimei di aña 2018, HNO TE a asumí e tareanan di Ekipo i Mobilario, ICT i di Transishon. Esei a inkluí tambe gastu di maneho i konseho relashoná ku Ekipo i Mobilario. For di meimei di aña 2019, e gastunan di maneho i consultant di Konstrukshon tabata direktamente pa kuenta di HNO VB. Ademas, for di e mesun periodo ei, HNO VB a asumí e ròl di SONA den e kontrato ku BNI.

Na momento ku e rapòrt a sali, ainda e entidatnan di HNO tabata preparando e kuantanan tokante e parti di kada un den ehekushon di e proyekto.

For di e dokumentonan di SONA, por a optené e siguiente informashon tokante e entidatnan di HNO:

	NAf. x mion
Kompromiso ku SONA a traspasá pa HNO TE na mitar di 2018	73,7
Kompromiso ku SONA a traspasá pa HNO VB na mitar di 2019	53,0
Total di kompromiso ku SONA a traspasá	126,7
Suma ku SONA i HNO VB a demandá bèk via Korte di kontratista BNI	20,2

Aki ta sigui un splikashon di e pòstnan akí.

Na 2018, SONA a traspasá atministrativamente un suma di NAf. 73,7 mion na kompromiso presupuestá i no presupuestá pa HNO TE. E suma akí ta representá gran parti di e diskrepansia entre e presupuesto asigná i e gastunan presupuestá di SONA. Pues, a lo ménos tokante e gastunan akí i otro posibel gastunan di proyekto, HNO TE tin ku duna kuenta ainda. E suma di NAf. 18,7 mion mensioná anteriormente, ku SONA a paga pa HNO TE, ta inkluí den e suma di NAf. 73,7 mion.

Na 2019, SONA a traspasá atministrativamente un suma di NAf. 53 mion na kompromiso presupuestá i no presupuestá pa HNO VB, inkluso e debe na Pais, di NAf. 15,1 mion na 'bouwrente' (interes durante konstrukshon). E suma di NAf. 53 mion ta representá gran parti di e diskrepansia entre e presupuesto otorgá i e gastunan presupuestá di SONA. Pues, HNO VB lo tin di rindi kuenta a lo ménos tokante e gastunan akí i otro posibel gastunan di proyekto. Na yüni di 2019, HNO TE i HNO VB a deklará ku nan ta para garantia inkondishonalmente pa e kreditornan di SONA relashoná ku e proyekto, inkluso, spesífikamente, e kompromisonan traspasá. Ya ku SONA a usa parti di e presupuesto otorgá na dje pa kubri gastu no presupuestá, e entidatnan di HNO lo a finansiá e kompromisonan traspasá na nan i otro gastunan mediante un fianza di NAf. 200 mion ku tabatin intenshon di hasi.

SONA i HNO VB a demandá NAf. 20,2 mion bèk for di BNI i aktualmente e debe akí ta pertenesé formalmente na HNO VB. Pues, HNO VB lo tin ku atendé esaki finansieramente ku Pais.

Ta solamente parti di e kostonan ku HNO tin ku hasi ainda pa e proyekto lo dependé di obligashon di pago ku HNO a asumí (ku SONA a 'transferí').

Manera SONA a remarká korektamente, e kostonan definitivo di e entidatnan di HNO lo ta igual na e pagonan ku nan a hasi òf mester hasi ainda pa produkto i servisio ku terseronan a suministrá. Debí na esei, e nivel di utilisashon real di e presupuesto lo por diferensia konsiderablemente for di loke a kalkulá inisialmente bou di SONA.

Na promé instante, Kontraloria a presentá e pregunta tokante e kuantanan finansiero di e entidatnan di HNO na Minister di GMN. No tabatin reakshon riba esei. Ademas, Kontraloria a puntra e entidatnan di HNO i Minister di Finansa si tin palabrashon tokante responsabilisashon finansiero na Pais, kontrol di e kuantanan finansiero i reglamentu di

e adelantonan ku Pais a fasilitá na e entidatnan di HNO. Di parti di Minister di Finansa, no tabatin reakshon. E entidatnan di HNO si a reakshoná.

Riba e pregunta tokante si a hasi palabrashon ku Pais tokante entrega di kuenta finansiero/informe di progreso tokante e proyekto HNO, dia 2 di òktober último, HNO Holding a indiká ku ta e respektivo ministerionan di Pais por splika pakiko e palabrashonnan akí no a ser hasí. Tambe, e fundashon a remarká ku su funshon ta solamente di sirbi komo propietario di e akshonnan di e asina yamá promé fase di e proyekto HNO. Segun e fundashon, ora a krea e struktura temporal akí, e intenshon no tabata pa e fundashon traha informe di progreso. P'esei mes, pa e periodo te ku aña 2020, no a traha informe/rapòrt finansiero di progreso di e proyekto HNO. Tambe e fundashon a remarká ku a traha informe finansiero anual pa Direktiva i Hunta di Supervishon di e fundashon, pero no a mensioná spesífikamente ku lo presentá e informenan anual akí na Pais.

Dia 29 di sèptèmber último, HNO TE i HNO VB a reakshoná, kada un apart. Den nan reakshonnan, nan no a indiká ku nan tin palabrashon ku Pais pa presentá responsabilisashon finansiero/informe finansiero di progreso, ni ku nan tin intenshon di hasi esei òf ku nan lo a entregá informe di progreso kaba.

Tambe HNO Holding a remarká ku pa e por finalisá su informenan finansiero anual di 2018 i 2019, e kuantanan anual di HNO TE i HNO VB mester wòrdu aprobá definitivamente promé. E dos entidatnan akí lo no por a logra aprobashon di nan kuantanan ainda debí ku nan tin mester di sierto informashon i dokumentashon di SONA ku nan no a risibí ainda. Den nan reakshonnan di 29 di sèptèmber último, mensioná anteriormente, HNO TE i HNO VB tambe a referí na falta di informashon ku nan mester risibí for di SONA pa por prosesá esakinan den nan sifranan anual. Despues ku a informá mas aleu, dia 8 di òktober último, SONA a duna di konosé na Kontraloria ku, na ougùstùs di 2020, el a notifiká Minister di GMN ku SONA no tin deber di entregá (parti di) su atministrashon na e entidatnan di HNO. Na mes momento, SONA a proponé un solushon práktiko. Segun SONA, no a risibí niun reakshon di parti di Minister di GMN. Mas aleu, SONA a remarká ku e no ta komprondé e pregunta di Kontraloria ya ku, entre tantu, un atministradó/akountent di HNO VB a bishitá SONA kaba i a deliberá ku atministrashon di SONA al respekto.

Tokante kontrol di e kuantanan finansiero, HNO Holding a informá Kontraloria ku el a hasi palabrashon kaba al respekto ku un buró di akountent. Riba e tema ei, HNO TE i HNO VB no a hasi niun deklarashon.

Den su reakshon, HNO TE a indiká eksplísitamente ku e lo no kumpli ku Kontraloria su petishon pa informashon, ya ku Lv ARC no ta aplikabel na HNO TE. Di su banda, HNO VB a duna di konosé ku pa awor e no ke bisa ainda si Lv ARC ta aplikabel n'e òf nò. HNO TE a remarká tambe ku, unabes ku su sifranan anual wòrdu aprobá, en prinsipio e lo ta dispuesto di sigui komuniká riba base boluntario al respekto ku Kontraloria i suministrá informashon. Unabes ku su sifranan anual wòrdu aprobá, HNO VB tambe ta dispuesto di deliberá riba base boluntario ku Kontraloria tokante kua di e informashonnan solisitá ta disponibel i por wòrdu suministrá, i den ki forma. HNO Holding no a indiká eksplísitamente si na su debido tempu e lo fasilitá e dokumentonan akí na Kontraloria.

E suma di NAf. 64,1 mion mensioná anteriormente, ku Pais a fasilitá na e entidatnan di HNO komo adelanto, ta inkluí un adelanto di NAf. 5,4 mion na HNO Holding. Segun HNO Holding, no tin palabrashon spesífiko ku Pais pa paga bèk e adelanto di NAf. 5,4 mion suministrá, i no a hasi niun pago relashoná ku e suma akí tampoko. Tambe, HNO Holding a indiká ku, den su atministrashon, e suma risibí a keda prosesá komo parti di e relashon di kuenta koriente entre HNO VB i HNO Holding. Esaki tin di aber ku e echo ku HNO VB, komo parti di e Grupo di Entidatnan di HNO, a duna Pais un pagaré tokante e fondonan ku Pais a hasi disponibel pa e proyekto di HNO, inkluso e suma mensioná. HNO TE i HNO VB no a duna un kontesta riba e pregunta di Kontraloria enkuanto si tin palabrashon hasí ku Pais tokante kon ta bai atendé ku e adelantonan.

Manera a ser bisá anteriormente, Kontraloria no a risibí reakshon ni di Minister di GMN ni di Minister di Finansa riba su preguntanan. Den Ministerio di Finansa su reakshon, den kuadro di e proseso di skucha tur dos banda, funshonarionan di e Ministerio akí a indiká ku a hasi diferente rekomendashon na e minister enkargá pa regla e relashon ku e entidatnan di HNO.

Promé ku a lanta e entidatnan di HNO, SBTNO a konsehá Pais pa lanta HNO TE i HNO VB direktamente i no via HNO Holding. Di e manera ei, lo a evitá ku HNO Holding a bira e akshonista úniko i direkto di e kompanianan akí. E derecho- i interesnan di Pais lo tabata mihó salvaguardá si ta Pais mes a lanta HNO TE i HNO VB. Despues ku a establese e kompanianan tambe un consehero hurídiko a konsehá Pais pa hasi palabrashon konkreto ku HNO Holding tokante dunamentu di kuenta finansiero i tokante kada kuantu tempu esei lo mester sosodé, pa evitá ku Pais lo no tin bista di e manera

ku e fondonan ta ser usá. For di un reakshon di HNO Holding, por dedusí ku no a sigui e konseho akí. Ademas, ta resultá ku e Holding akí ta di karakter temporal.

Banda di e echo ku algun kuenta finansiero no ta kla, tin diferente otro aspekto relashoná ku e proyekto HNO ku no a wòrdu elaborá ainda òf ku a wòrdu atendé parsialmente so. Segun e funshonarionan di Ministerio di Finansa, esaki ta debí, di un banda, na falta di informashon i di otro banda, na falta di desishon. E aspektonan akí tin di aber prinsipalmente ku e papel ku e entidatnan di HNO ta desempeñá. Tin diskushon tokante si nan ta kai òf nò bou di sektor kolektivo, tokante ken mester karga e kostonan èkstra di HNO i kon mester prosesá esakinan, i tokante te kon leu e adelantonan duná na e entidatnan di HNO lo wòrdu paga bèk via un fianza adishonal na HNO òf na un otro manera. Fuera di esei, ainda e interesnan di Pais no ta debidamente salvaguardá den kaso di un enagenashon di e kompleho di edifisio di hospital i/òf e akshonnan den e entidatnan di HNO.

Por último, Kontraloria ta remarká ku, den kuadro di e proseso di skucha tur dos banda na nivel atministrativo ('bestuurlijk hoor en wederhoor'), no a risibí un reakshon di minister di GMN ni di minister di Finansa.

Konklushon

Kontraloria ta konkluí ku, a base di e kuenta definitivo, di parti di SONA, a eksedé e presupuesto di e proyekto ku NAf. 87,6 mion debí ku a hasi gastu no presupuestá. Gran parti di e suma akí ta debí na e retrasonan ku tabatin durante ehekushon di e proyekto i e echo ku e eksonerashon di derecho di importashon i OB, konsedé anteriormente, no tabata bálido.

Mas aleu por konkluí ku HNO TE i HNO VB tin ku duna kuenta di a lo ménos NAf. 73,7 mion i NAf. 53 mion, respektivamente, na gastu relashoná ku e proyekto. Ta te ora e suma final di gastu ku e entidatnan akí a hasi den kuadro di e proyekto bira konosí i ku kaba di atendé esei ku nan definitivamente, lo por bisa kuantu a eksedé e presupuesto di e proyekto akí na tur.

Ya ku, komo fundashon fundá pa Pais, ta HNO Holding so tin un relashon direkto ku Pais, no tin muchu klaridat tokante e papel ku Pais lo desempeñá relashoná ku HNO TE i HNO VB den futuro si tene kuenta ku, manera HNO Holding a remarká, ta un papel temporal so e ta desempeñá den e struktura usá. En bista di esaki, no tin garantia ku Pais lo risibí responsabilisashon finansiero tokante su likidashon, pa Pais por investigá

esei mediante su órganonan di kontrol. Ta eksistí e riesgo ku Pais lo no por obligá pa e responsabilisashon ei tuma lugá tampoko, ya ku ta HNO Holding, i no Pais, ta e akshonista úniko i direkto di e kompanianan en kuestion.

Tin diferente aspekto mas relashoná ku e entidatnan di HNO ku falta pa elaborá. Por ehèmpel, ainda mester disidí kon ta bai distribuí e gastunan èkstra di e proyekto.

Por último por konkluí ku debí na e echo ku no ta tur informashon relevante ta disponibel i ku, den e fase final akí di e proyekto, ainda tin desishon nesario ku falta pa tuma, no ta muchu kla ki impakto finansiero e proyekto lo tin riba presupuesto di Pais na final di kuenta. Loke entretantu sí tin klaridat tokante dje ta ku na e altura akí, ainda e interesnan di Pais no ta salvaguardá debidamente.

Rekomendashon

Ta rekomendá Parlamento lo siguiente:

1. pidi minister di GMN i Minister di Finansa klaridat tokante responsabilisashon finansiero di e gastunan ku e entidatnan di HNO a hasi, inkluso tokante e nivel real di gastu di e proyekto i e finansiamentu di esakinan;
2. puntra minister di GMN i di Finansa si entretantu e interesnan di Pais ta debidamente salvaguardá den kaso di un posibel enagenashon di e kompleho di edifisio di hospital i/òf e akshonnan den e entidatnan di HNO, i si ta asina, di ki manera;
3. pidi Minister di GMN pone e resultadonan di e kontrol di e kuantanan di e periodo di NHN (2011-2015) i e periodo di HNO te ku 2018 na disposishon di Parlamento.
4. pidi Minister di GMN pone e kuenta final kontrolá di SONA na disposishon di Parlamento;
5. pidi minister di GMN pone e responsabilisashon di SONA tokante e gastunan di proyekto hasí na 2019 na disposishon di Parlamento asina ku e kontrol di kuenta a tuma lugá;
6. pidi minister di GMN pa informá Parlamento ki dia por spera e kuenta final di e entidatnan di HNO i, ademas, pidi minister pone e kuenta final akí i e resultadonan di e kontrol di kuenta korespondiente na disposishon di Parlamento asina ku kaba di prepará esakinan;
7. pidi minister di GMN i Minister di Finansa kambia e struktura di 'governance' di e entidatnan di HNO, siguiendo asina e rekomendashonnan ku SBTNO a hasi, i sino, splika dikon no a sigui e rekomendashonnan akí;

8. yega na palabrashon kla ku e entidatnan tokante e transparensia i responsabilisashon finansiero ku nan lo mester brinda;
9. na momento di determiná ken mester karga i ta responsabel pa e diferente gastunan èkstra di e proyekto, tene kuenta tambe ku e gastunan di proyekto hasí den e periodo di NHN, ya ku aunke nan no ta kai bou di e periodo di HNO, nan ta forma parti si di e proyekto di hospital.